

嘉慶直隸太倉州志

直隸太倉州志卷三十八

人物

文學

四

寶山縣

國朝

柯炘字以傳遼深經術兼通二氏學爲人虛和退遜嘗游秣陵臨安與騷人勝流詩歌酬荅所至動人晚棄諸生自號可名公發跡南翔里

侯楷字友培長于古學不求聞達上海陸鳴珂顏其堂曰尙志弟林負美材亦以詩文自娛

姚宏燦字尙友邑廩生能文有大家風範時有李觀光

者三試第一俯視儕輩知縣王季試拔宏聚第一李慙且服同時繆廷宣字聲遠篤志好學亦以詩名

李肇夏字西閭監生嘉猷從孫博學好古書翰與華亭王圖炳齊名日下有江南小李之目族人炳字孚五詩文敏絕以貢生終

沈步青字天申性穎敏坦易于書無不窺兼通方脉決生死友人孫許緝高介士也與之揚風挖雅二老風流識者稱道之

林中鶴字天翥邑廩生爲人耿介折節讀書作文隨意選詞戛戛獨造與修邑志時有黃兆琮字廷碩張黃卓字鴻萬姚宏文字纘虞並稱名宿

歸涵字淳濡能詩少應童子試知縣詢太僕有光支派
涵曰明公憑文校士何以家世爲知縣器之父母歿思
慕不忘每事卜於柩前生平以忠恕自期

金潮字來青雍正七年歲貢生與李實同爲陸隴其高
弟潛心力學修身勵行張伯行撫吳時聘在紫陽書院
演講理學後伯行總督倉場仍延往纂輯書集著有學
庸集說

沈卓字穎發父早喪事母至孝家不能延師寄食僧舍
執經於陸燿三年遂通六籍工詩文積成卷帙康熙五
十九年舉人不數載病亡

王世樞字斗初中雍正十三年順天舉人乾隆元年舉

博學鴻詞 召試不第選授崑山訓導性嗜學博通經史
及諸子百家詩古文無不工著有訥庵詩文集陳檢討四六牋注

陸芳槐字聽三少入蘇州紫陽書院讀書院長吳大受王峻皆忻賞之乾隆九年副榜十七年順天鄉試舉人三十一年選授懷寧縣訓導芳槐夙有文名及在官與諸生講論先正程式皖人以爲得師嘗被檄審勘水災按戶檢察無濫無遺又督修水壞埂圩工程鞏固清釐府屬錢糧冊委各鄉捕蝗皆殫極心力各得其宜年五十二卒于官著澤樓詩文皖江吟草藏於家

程師濂字茂來乾隆三十年舉人博學工詩教授生徒

食指二十餘口婚嫁喪葬皆仰給焉嗣應聘爲蓬萊山
長造就多士六十年截取知縣謁選卒於都

朱桓字覲展歲貢生乾隆三十六年鄉試以年逾七十
欽賜舉人能文金壇王步青選刻婁東文十子之一
凡歲科試每在前列主講松陵書院多所造就屢選試
藝皆行於吳越間著四書指蒙岡西古文岡西吟草
姚靖棠原名懋崇字德超弱冠以詩文名工四體書精
篆刻年未三十歿輯有金石韻府五卷

汪之麟字天若博學能文持躬復謹飭游京師王公大
人多以大器期之惜未展其才而歿

王簡字敬叔縣學生植品立身授徒以數百計士林推

重之爲文簡練中別饒機趣所著有無傲課塾二十卷
四書叅宗八卷

邱一韓字雲五縣學生與弟一范一夔俱有文名兩弟
相繼歿撫孤恤寡取給硯田試輒高等有文稿行世王
步青柏謙序

毛際盛字泰交監生幼穎悟工詩古文好搜金石碑刻
以資攷證父大瀛先任利津縣丞際盛奉母就養居二
年應試卒於京邸年未三十士論惜之所述有說文述
誼登岱楚游等草

崇明縣

元

楊文驥字希顏苦志力學視履必飭時秦玉以儒學名於太倉希顏以師範稱於邑故號秦爲天下士呼楊爲百里師

朱禎字廷瑞博學能文嘗爲楊子縣學教諭至正間與朱曷同修邑志

〔明〕

倪大成字景韶謹厚博雅時有李琮字良玉亦性敏好學永樂中與景韶修郡志

施頓西沙人十歲能詩題畫扇云巧鳥奇花點筆成花無香氣鳥無聲憑君舒卷憑君看花不凋零鳥不驚未冠而亡後族人修家乘誤載其詩於弟類名下夢頓誦

前詩乃改正之

張淮字子東嘉靖九年貢生天姿穎異有牡丹百咏爲吳中先輩所稱尤善丹青人得之若拱璧

梅伯昂字用頰嘉靖中與弟伯奇俱以貢生入國子監後爲阜城知縣資識超邁詩文立就書亦工伯奇字用常安仁玉山兩學教諭陞金華府學教授後選唐府紀善王重其行待以殊禮晉階長史以老病乞歸優游林泉卒年八十有二

陳詒字汝疇性穎敏操履篤實通毛詩後進業詩者多宗之嘉靖三十三年歲貢生授南京武學訓導歷任弋陽教諭所至士林推重之

陳嘉言字孔彰家貧嗜學操履不苟隆慶四年以貢生授壽州學正不屑事權貴未幾告歸閉戶誦讀學春秋者多出其門凡族人貧者賙恤之年將七十一日具冠服乘肩輿徧詣親友告訣沐浴更衣而逝

倪珣字汝明廩生幼孤性端重嚙笑不苟杜門讀書爲文黜浮崇古卓然大雅之遺

王琳字生洲授徒三十餘年邑中士大夫多負笈其門尤善孳窠書學者宗之弟球號順崑亦有名壇坫時稱二王

陳登明字荆瑜神宇清逸善詩古文詞游武夷豫章所過佳山水多吟咏

陳炳明字斗如十五歲小試卽冠其儕兼習天文象數
河渠諸學年三十二而卒時有俞惟寅字葵之貢生閉
戶讀書市人罕見其面

呂於韶字庶虞學廩生以年資歲貢預修崇明縣志時
海氛未起於韶預憂有變著桑梓籌難紀 鼎革後寓
太倉十八都爲鄉祭酒順治十三年卒著有紫澗集
袁廷選字公廉少孤食貧篤學崇禎十年由貢生爲丹
徒縣訓導有潤城化雨之目後告歸謝絕世緣知縣劉
燁稱爲瀛海達尊

張浩字天一拔貢生性篤學明春秋經義所著四書增
刪說約春秋備考諸刻子鳴琰字佩聲邑庠生克承家

學有鬻妻償債者以脩脯所入代償之

施世德字求孟肆力古學出其門者皆成名士

管玉衡字孟璇邃于古學晚年隱居著書詳藝文類

王錦裳字韜生明季增廣生潛心理學家徒四壁宴如也所著詳藝文類子者佐自有傳

陳元孫字子善德性淳厚學問該博常爲郡庠教導年八十餘卒

黃仁字士安長於賦咏性不苟合有橘隱集藏于家

黃福字叔平天姿秀發工於詞翰每一詩出人爭傳之
國朝

管父才字麟公康熙九年進士遂於理學與同年陸隴

其論諸儒同異深相契合性孝友通籍後以親老不仕
家居教授處兄弟間推肥就瘠和易融融又受業師程
某苦貧父才贍養終身死爲經紀其喪邑人重之

袁終彩字素含邑庠生好學不倦與同學徐燦字介炎
輯四書要達行世

何焯字屺瞻崇明庠生少負盛名康熙二十三年拔貢
入都四十一年冬以李光地奏薦特賜舉人明年

賜進士選庶吉士入直南書房兼修書武英殿旋
丁外艱歸五十二年冬再以光地薦授編修五十四年
秋坐事逮問尋奉免罪令仍直武英殿六十一年卒
特贈侍讀學士賜金歸葬焯穎悟強記博覽羣籍

長於考訂評閱古人之書必尙論其世疏通證明指摘
謬誤如兩漢書三國志李善文選王伯厚困學紀聞率
取宋元書本手自點勘世皆寶貴之書法出入歐褚性
捐介偏僻見人文章多彈射少許可故所爲詩文亦不
肯多傳於世

施何牧字贊虞幼穎異弱冠爲縣庠生康熙十七年舉
人二十四年成進士授吏部考工司主事典試貴州再
遷稽勳司員外郎晚年乞歸寓吳中崇明苦蘆課大吏
以何牧言除十之八里人德之年耄力學不倦鄂爾泰
爲布政使造門執後學禮以兩間書屋額顏其齋卒年
八十三

沈長澤字原采吳縣庠生康熙二十五年歲貢力學工書選徐州豐縣訓導勤於會課士風丕變以冬月謁廟衣單中寒疾卒貧不能殮諸生經紀其喪而歸

鈕滄字星濤家有小圃構屋三楹環植竹木友人何焯顏之曰聽花日夕坐讀其中篝燈宿火寒暑不輟學遂大進爲文鎔鑄經義歸于自然後進奉爲楷模初以拔貢生入太學名動京師後中康熙五十六年舉人年已近六十矣子僅字少叔亦擅文名先以五十三年中舉人任浙江分水知縣

楊遠字乾初少貧苦志力學造詣遂深曾於江陰科試集爲社課曰金蘭會同會者數百人遠執牛耳焉生平

耻以才自見每日吾人品節不修雖才華蓋世亦無足
取年九十一以歲貢生任江浦訓導踰年告歸卒弟達
康熙五十年武舉善劍舞仗氣誼有古俠士風子釋庠
生有至性年近七十事父猶親厠諭純見治行傳

施廻濶字正夫邑庠生器識恢通尤長於吟咏生平足
跡半天下遇事感觸一發於詩其宗旨取法杜陵沉鬱
蒼茫得其神髓卒年七十有六

吳金城字天府其先自常熟徙崇明初依外家冒金姓
後歸宗不忍忘其初故名生而穎異好讀書工吟咏知
縣朱衣點重其名延修邑志年八十而終同時陳令言
字聖嘉居東阜沙亦能詞章卒年八十七

黃運開字先登康熙四十一年舉人明年會試薦而不遇自此絕意仕進杜門埽軌當時重其品爭欲致之終不通一刺晚喜潑墨作雲山竹石有宋元人意

施晉秀字友唐穎悟早歲爲諸生屢試輒冠其儕康熙五十二年舉人雍正二年赴公車卒於京邸晉秀立身嚴正奉親盡孝二子仁漸仁濟能世其家學

沈仁士字譽斯生而穎異弱冠以五經補諸生試輒冠軍當時爭延爲師

沈王志字尚其邑諸生好學善詞翰妻施氏亦知詩聞中倡和甚夥

施德濟字間遠康熙五十六年舉人初以孝友聞于鄉

昆弟三人飲食必偕有姊不字養之終其身教授弟子能闡經之奧各聞所未聞或質以疑事晰之不爽毫末乾隆元年丙辰舉孝廉方正未赴卒

李杜詩字範蓮弱冠爲諸生康熙五十九年舉人誓制義風神澹蕩同時有劉萃乾顧炳元陸黃峻齊名而杜詩爲之冠張伯行以國士目之大興黃叔琳嘉定張鵬翀敘其遺稿行世子尚美字鴻珊廩生歲科試輒冠其軍中年後卜居石湖以詩酒自娛

蔡瓏字文舟世爲崇明人父廷傑諸生遷於崑山設教石浦上日辨色而興攝衣端坐讀書講道卒後私謚恭定先生瓏年十五補蘇州府學廩生有聲庠序昔歸有

光顧炎武皆居安亭壠居崑山之茜墩地相接其學私淑兩公爲多生平謹慤寡嗜欲教人以躬行實踐讀書好古爲文古質如其人中年自茜墩遷於青浦之珠街里從游益衆經其指授皆知名晚由歲貢生選舍山縣訓導以師道爲己任嘗聚諸生講學讀後漢書范式傳誦聲哀厲至淚下時有諸生某在坐忽起曰某與某素好以田故將訟諸官今聞此有愧古人多矣懷中出訟牒毀之以老告歸卒年八十有四

王者佐字佑君錦裳子邑庠生敦行誼著有四書擬言大易春秋孝經禮記擬言等書乾隆元年舉孝廉方正以老疾辭不就年八十餘卒於家四年 詔修三禮訪

故老遺書子庠生大賚上者佐所著禮記擬言於朝
多所採擇

胡承烈字佑人弱冠爲諸生試嘗冠軍以歲貢生任奉
賢縣訓導爲人和平樂易謁見者若坐春風承烈口講
指畫率多成名歸年八十餘卒

黃申字翰周質敏嗜學由庠生入貢家富於書又得徐
氏傳是樓所藏益恣搜討無間寒暑詩格清勁其師李
杜詩嘗嘆曰黃生庶不以多財損志矣詞尤媚秀張鵬
翀極賞之親歿不復言仕于吳郡因山構止止園吟咏
其中後旋里任卹姻族資以舉火者十餘年雖不復至
園而嘗謂吾精神所依魂夢故不忘也及卒遂卜葬焉

子蘭芝蔭承先志稱克家

郭備琦字聘芝監生考授州同知學有源本著中庸擬義見賞於大學士鄂爾泰先是韓菼薦修一統志名著京師後南歸卒

沈洪字清源弱冠補庠生人稱書淫先世多遺貲至洪而貧口不言錢有王夷甫之風

柏謙字蘊高生有穎異五歲時已有盜警居人出避謙奮然曰是間有三丈夫何畏父問三丈夫爲誰對曰父伯父兄是也雍正八年成進士改庶吉士授編修屢充順天同考官福建正副考官十一年以母逾七十陳請歸養爲人訥於言詞敏於文翰事曾祖母父皆能養志

往往解人之危急崇明沙田增損無常板籍易消舊有一因一則之法而毫強利於兼并漸紊其制謙言諸縣令復其舊爲文以饒于碑尤工時藝楷書亦在虞歐間前後充 奉宸院供奉一統志館 武英殿經史館明史綱目館纂修官性情恬靜家居垂二十年無復榮進志後遷常熟卒年六十有九

沈文鎬字紹岐少工時藝雍正十年舉於鄉明年以進士第三人及第授編修任山西學政公愼自矢大同朔平諸郡僻處邊隅鮮知說學文鎬擇雋邁者數人重加獎勉送省城書院肄業文風由是漸振後以病乞歸卒張濟字士階父聖授邑諸生濟少承指畫有聲黌序間

既構別業於吳郡葺邨讀書刻苦文益工雍正十年順天舉人乾隆二年試授內閣中書尋協辦侍讀事會有詔令三品以上舉軼才如馬周陽城者大學士史貽直以名上辭不就刑部侍郎勵宗萬河工薦亦堅却之後以病乞假歸卒

劉萃乾字君易雍正十二年以歲貢生授涇縣訓導學者夙稔其名咸僦舍請業絃誦聲徹堂廡明年城西街火延燒數百家貧者割俸恤之頌聲翕然邑東北二十里爲琴溪徵寧孔道也亘二百尋深莫測歲久橋圯乾隆二年知府程某與知縣景四維謀新之冒風雨往來董勸未幾醵金逾萬鳩工庀材三年而竣橋成一載卒

於官涇人建位橋亭以祀舉人鄭相如爲傳

宋孔傳字斐成庠生工詩古文詞張伯行慕其名召之
長揖不拜令赴課紫陽書院孔傳以不嫻時藝辭伯行
曰士各有志不可強作論體以發聖賢之微可也伯行
去官孔傳卽旋里以張采太倉志舛誤作辨誣一卷尤
好搜采邑中文獻趙廷健修志多采錄之如施珽陸朋
頤國樊璜各傳皆前志所遺者也年五十餘卒

劉觀我字詩徵乾隆九年舉人行醇言修邑中人奉爲
師表選任歙縣教諭講論不倦一時以經義就質者至
講舍不能容贊善程昌期未第時流寓崇明執贄門下
至是觀我招之居宿署中飲食教誨迄於成名歙人翕

誦之在任十二年遺疾卒子芝香庠生爲人孝謹父歿後哀毀骨立不逾年卒

陸序煒字瑞文廩生性狷介屏絕酌應閉戶讀書一時號爲經笥生徒宗之者數百人知縣許惟枚慕其名數請之終不通一刺惟枚嘆曰此所謂其人如朱霞白鶴可望不可致者乎與兄同居以友愛聞

施立字松友歲貢生少穎異通經史長於詩古文詞家貧不事生產以經訓引進後學從游者百餘人卒年六十有二

黃秉鈞字台揆昌平州知州振鳳孫府學廩生工文善詩尤精書法隸體出入漢唐人得之珍如拱璧性耿介

敝衣藿食淡然自處有餽遺者輒却之年七十餘卒子
廷琛字成大邑庠生以詩名

倪宸斌字紫垣附監生善詩歌工草隸時稱豪逸

黃堅字念庭庠生儻重氣節爲文揮灑咄咄逼人亦
長詩詞年方壯一日招其友柏謙等會飲酒酣謂曰吾
當先公等逝謙詫之堅曰欲君爲我作傳耳旋以疾歿
樊謙字昭令博通經義受知於學政魏學誠所刻試牘
贈炙人口爲人慷慨尙義歲大飢同宗某鬻女於陸姓
謙贖回嫁之贈如已女孫魁少孤力學爲名諸生曾孫
卓乾隆五十四年副榜貢生

施涵字東淶歲貢生少孤刻志力學每搆一藝沈思獨

運心寂色灰必期愜意而止金壇王步青采入婁東十
子性兀傲不諧于世世亦鮮有知之者巡撫邵基課士
於崇明得涵卷喜甚目爲江南之雋未幾基卒涵痛知
音不作絕意進取怡情詩奕年七十七卒

施彙字征吉恩貢生兄弟四人並有聲庠序而彙爲最
品端學醇論文一宗先正後進經其指授皆有矩矱遺
稿一卷沈德潛敘以行世子一桂別有傳

何忠相字罕勳號二山優貢生能文蔡寅斗別振采彭
澤令咸與定交乾隆九年十七年試順天兩中副榜貢
生而忠相亦倦游歸矣關中趙廷健蒞崇明時與劉觀
我施涵等並修邑志稱善本又嘗主和陽閬川兩書院

多所造就是時忠相與李尙美同縣齊名尙美骯髒不
羈而忠相雅澹文亦如之金壇王步青選其文人婁東
十子

楊樗字木文乾隆十五年舉人爲文樸茂精純家居教
授邑中名士多出其門銓選及期屢催不赴晚益著書
自娛卒年八十有三

黃垣字國藩道隆子少穎異讀書數行並下乾隆十九
年進士居家以經世爲志二十年海潮溢歲大祲公議
設廠賑粥垣身董其事不辭勞瘁狼山以北皆航海就
食邑令趙廷健修崇明志任賦役一門於古今利弊窮
源溯流使後來有所考年四十六志未成而沒弟挺字

惟甄讀書過目成誦未弱冠受知於邑令許惟枚輒稱
奇才後令趙廷健慕之欲見而不可舉優生又固辭不
就卒年六十有五著樸牛詩集光祿寺卿王鳴盛序之
徐慕隆字耕南歲貢生中年寄居常熟貌古氣逸所作
詩文不主故蹊自成一家歲科試輒冠其曹學政夢麟
尤深激賞既老以吟咏自娛興到命筆傾刻數百言性
好引掖後進有以詩文質者不憚委曲獎成之年七十
四卒

楊家駒字軼千邑庠生父蘭玉廩生才識過人嘗上書
巡撫張伯行目爲江南奇士家駒幼承家學研尋經史
皆手鈔成帙教授生徒往復不倦邑中士子賴其陶成

者甚衆子不疑早擅文譽乾隆十八年舉人任霍山教諭光辰振雲俱邑庠生

施一桂字芳林邑廩生乾隆三十四年進士授兵部主事改武選司尋充順天鄉試同考官邁疾卒於京邸年五十有一一桂爲人丰采凜然不干人以私質敏嗜學爲文以經義爲宗服官勤敏奉職之暇閉戶誦嘗顏所居爲今雨齋與知交作真率會分題刻燭歌詩傳播於時

蔣璋字熊占天姿穎異家貧借讀一過不忘年十六補邑庠旋食餼朋試輒冠其曹嘗肄業鍾山書院與李尙美過江寧府學分記各碑俱一字不遺所著洋洋灑灑

千言立就性嗜酒每飲天趣橫生醉後捉筆益飄飄有
仙意惟制藝則經營慘澹一字不苟曰代聖賢立言以
躁心出之非主敬之道稿中多近胡思泉艾千子作卒
年不永七林惜之

黃文玉字日初文品醇雅書詩之氣粹然盎然兼之內
行完備鄉黨以孝聞

王香字蘭谷邑庠生志以理學自在刻苦嗜古四書五
經中有一字之疑必究其源性嚴毅目不斜視終身不
履非禮作止語默有儒者氣象年三十無疾逝

張灝字東平邑庠生幼嗜學既長與施灝游問業於沈
文錫刻苦勵志一編徹夜率以爲常中年嗜詩鈔寫李

杜韓蘇陸諸集數十帙嘗語人曰吾手錄一通勝十年讀也乾隆四十一年遷于昭文縣支塘鎮家故貧授徒自給久之念先人柩在崇明舫海載至虞山而厝焉越歲崇明被潮鄉人稱其孝思且服其先見卒五十七

朱炳虎字駕唐乾隆二十四年舉人選授鹽城教諭卓異薦陞廣東清遠縣知縣署惠州海防同知踰年解組歸邑令延掌書院年六十五卒炳虎七歲能文稱神童文根柢六經精深刻露一振浮靡之習任山長從游者益衆爲剖析疑義指陳奧旨士林宗之

袁夢桂字芳巖早失恃事繼母以孝聞家貧一弟七妹俱幼竭館穀所入以奉薪水苦志力學工舉子業識者

稱之乾隆二十七年舉人入方略館修書議敘授福建安溪知縣修舉廢墜懲奸吏杜私謁雪疑獄一境肅然四十四五兩年充鄉試同考官號得士年五十七卒於京邸

林斗光字病元庠生羽苞子苦志力學至老不倦生平尤敦孝友族黨稱之卒年八十九子皞恩乾隆五十一年副榜貢生

施槐字懷芳性敦敏自少攻苦父渭爲延名師益友尋繹討論學遂有成生平器識恢宏幹濟自任以廩生入貲授訓導乾隆五十四年冬爲父營葬崑山躬親楬柩得疾不瘳卒

沈文明字紹唐乾隆元年舉人有學行兄文鎬督學山西預校文藝識拔多知名士中年後家居授徒立文峯學塾從游者百餘人

郁溥字天士乾隆九年舉人家貧與弟淳躬耕讀書諷誦不輟所學日進敦篤內行居喪一遵家禮外家陳某貧老無子爲終養立後有貧而鬻妻者出貲全之平日攜一冊自記功過名曰問心集淳字厚君歲貢生性行與兄同而潛心易理從弟中字懷寬洵字懷潔皆有聲庠序

直隸太倉州志卷三十八終

直隸太倉州志卷三十九

人物

武功

太倉州

明

王璘字廷用定遠縣人任鎮海衛指揮僉事讀書善騎射宣德二年交趾梗命將往討時同衛周指揮在選璘毅然曰彼衰效役少壯乃留居豈臣子死綏職卽日請代行從安遠侯柳升抵昌江戰屢捷深入會大雨泥扼馬足死之

歐千斤洪武初爲京師列校時有善搏者稱絕技衆推

歐勝之改授太倉衛百戶既老嘗乘馬過橋不進臂挾馬趨而過之

武政字維德鎮海衛指揮性警敏好讀書知時務天順間巡撫劉孜奏兼督太倉衛事將老致仕所居水木亭榭一時名士多樂與游有詩文唱和

武尙文鎮海衛指揮癸丑倭亂奉檄統所部駐上海五月倭逼尙文率衆出東門遇賊輒敗之乘勝進賊伏西蔓笠橋下伺尙文過利刀斷馬足尙文死同時死者縣丞宋鰲鎮撫吳賢督撫以下來奠哭甚哀曰三人得死所不知吾輩若何一軍感泣

楊尙英字時倭鎮海衛千戶猿臂善射長踰七尺膽決

視部曲有恩信倭亂海上尙英起行間水陸大小數十戰多有功以蘇松叅將爲浙江副總兵官都督世襲指揮嘗禦賊于海洋會有天幸風破賊舟得級三百有奇故世盛稱楊將軍習水歸勦大第治園池握槊命詩鐘鼓聲不絕不五載產盡歿無以殮

施德政字正之萬歷十七年武進士歷陞浙閩都督平倭有功馳逐紅夷閩人德之遷神機營右副將復掛大同總兵印未任卒

鄭嘉謨字伯明世襲太倉衛指揮天啟四年任浙江臨觀備倭先是兵謀殺掠無禁嘉謨至誅其首亂衆始帖然擢福建撫標游擊值紅夷要挾互市巡撫南居益令

嘉謨會勘澎湖破走之生擒酋帥高文律等七年遷江西都事尋授廣東潮州參將程鄉平遠銅鼓山諸穴巨寇張惟天蘇朝祿陳萬鍾凌秀等聚衆各數萬嘉謨撫降之全活被擄男婦無算海寇李魁奇郭芝葵旣撫復叛連船數百焚掠元鍾嘉謨率騎兵馳援獲其將楊策追薄大城柘林寨被圍三日嘉謨用番卒三眼銃殪其衣兜甲者數人賊退圍解賊又犯揭陽知縣馮元麟夜張元武廟旗幟爲疑兵宣言嘉謨救兵至賊委糧遁其見憚如此崇禎五年敘功晉漳潮總兵積勞冒瘴未及任而卒嘉謨內行淳至事祖母母以孝稱

俞仲麟字昭彥少有膂力爲武庠生遇御史選儲將才

收錄之崇禎十五年海寇猖獗巡撫召募進剿仲麟隸
太倉衛傅介子麾下入海擒賊功成及錄遂杜門不出
授徒餬口喜爲墨牡丹亦工書

國朝

尹雲龍字端夫鎮海衛籍少年任俠會鼎革鄉民爲
亂雲龍與浦姓兄弟范天仲蔣若萊輩各募衆自衛里
中賴之

王師南下浦范等奉命安撫嘉定民梗移師破之每
于軍中免人于厄有陳氏一門就戮全其孤順治八年
仍以舊員挽運擢京師騰驤衛掌印守備尋陞福建汀
州遊擊康熙十三年耿精忠叛固守上杭僞伯劉進忠

來攻不能下出奇計退之奏捷授隨征總兵十六年精忠授首卽乞休歸子振祚字源發岷州衛千總後從征噶爾丹有功擢泗州營守備年近七十退歸

浦嶧字君書勇力絕倫乙酉夏 大兵方渡江州中

羣不逞結黨爲變嶧同王元初吳體元等團練鄉勇奉書募府率士民郊迎捍衛城門事定錄功署末將銜尋被曹耦所訐不及仕卒

王元初字瑞徵衛籍武進士工六法師王鑑得其指授吳體元字秀叔家本素封喜結客自少習投石超距鞭稍刀劍之技無不精熟以迎師功例得弁劄不就中順治五年武舉爲洮守衛千總署守備十年邊塞覘知間

帥有跋扈意急請歸次年變作人服其先見

周京字西侯父士達有隱德孝養得其歡心母多病侍奉湯藥十三載竟得霍然王原祁贈以印章曰秉孝弱冠棄舉業習騎射由千把總任吳淞中軍守備署叅將地介海濱稱煩劇值歲祲賑饑防盜士民安堵旋居父母喪引疾告歸子象育字敬孚年十八有將材康熙四十四年授劉河把總旋陞千總父歿歸里奉母卒

毛鉞字憲宜康熙五十二年武進士官福建將軍標守備訓練有方每事身先士卒將軍特疏保薦引

見回卽調都司以母老乞歸卒年七十九素工文翰著有公餘集兼工畫理摹宋元名家頗得其妙

嘉定縣

明

嚴大顯弟大年大成大俸大邦黃姚里人父初無子聞浙有神禱輒應渡海求之颶風飄別島島中祠草野穆夏神像四皆身披甲冑威靈懾人父心動卽再拜以禱期年生大顯父喜字以草生已連舉三子悉以神號次第之大年曰野生大成曰夏大俸曰穆最後舉大邦曰小乙五人生而勇健皆好武略弓矢刀鞘各有專長而大邦兼之嘉靖三十一年倭犯寶山繼過黃姚五人計曰賊可擒也乃邀其歸路賊敗入海遁去知縣萬思謙遂僉大顯等爲耆民領兵勦賊時同知任環督賊每

戰必爲士卒先思得奇士共効死得五人大喜與之提
兵往來環嘗夜追賊墜溝中馬不能起會五人突至挺
鎗大呼賊散大成負環疾走前阻河橋已撤一躍而過
三十二年賊千人自寶山趨黃姚掠婁塘北攻太倉幾
陷據吳淞掠月浦燬羅店薄縣城太顯等號嚴家兵戰
東門乘風縱火賊敗走追至青村復敗之五里橋習家
墳會浙江總制王忬遣叅將盧鏜赴援至合擊之賊大
敗走旣自柘林分道寇崑山將逼蘇州大顯等擊之眞
義有同隊嚴鐵塘者老書生也效古戰法背水以敗叅
政翁大立怒將行軍法適環自華亭來力請得已更勞
以羊酒曰吾兒無恐乃復戰賊敗入太湖大立亦喜賞

銀牌簪花三十三年賊陷崇德北犯蘇州巡按御史檄環及總兵俞大猷夾擊四月嚴家兵及彭氏苗兵邀之盛墩斬首三千級戰泖河斬首七千級戰壩上斬首八百時賊存者約二千人復自崑山趨蘇州五人血戰間門外賊大敗引去獨有八十三人剽掠西上抵南京復返太湖五人邀之水口賊復入湖焚剗洞庭兩山大年乃使一人入賊爲鄉導引至木瀆水絕處五人從後急擊無一脫者賊亦臨鄉導督撫奇之欲奏請授職固辭復歸黃姚爲編戶三十四年知縣楊旦夾江東西立十三寨以扼賊衝江以西六寨令五人分守賊有名馬數匹繫海上近之輒人立而踞不能制大成欲往取之賊

喜以爲往必遭蹶聚而觀大成踴鬚直上盡驅以歸賊已駭及渡川涉橋橋高數仞馬不敢渡大成乃右挾馬左挾人過之賊望見之益大駭自是不復近寨一境以安三十五年賊復大至自吳淞江轉寇松江而以寶山爲巢穴官軍屢敗仍檄五人移師往擊戰寶山之陽賊敗登山時官民兵數萬將帥數十人相視不敢發大邦獨從山後潛上手斫七人大顯等帥諸軍繼進賊大潰斬首數級生擒百餘督撫喜益重賞之當是時青兵沂兵處兵號稱勇銳然遇賊屢北狼土兵僧兵雖屢捷亦時岫獨嚴家兵袒裼大呼東西馳擊或陷陣出其背兄弟五人相捽如左右手賊望見旗幟輒遠遁或與遇無

不披靡奔潰環每見五人戰勝必特賞呼不名必曰吾兒與同食飲臥起故能得其死力嘗慰之曰吾始以同知將兵與若兄弟寢戈擐甲有年陞僉事進級副使吾功皆若功若兄弟雖不願仕終當奏天子使知海畔有虎臣耳五人再拜謝曰大顯等感激知遇且目擊桑梓塗炭誠奮不顧身卽敗死瞑目今者不自意屢勝賊前後賞賜逾量安敢望爵且吾聞爵易拘人俟海波不揚從明公乞此身釋甲荷蓑笑傲東海上亦安所事爵三十六年環以寇平請終制詔加山東參政以歸旋卒自是無復有能用五人者矣旣盜賊仍出沒江海臺檄大年大邦大年守嘉定而大顯大成大倖守常熟會大盜

發部中知縣黃應嘉疑其所使俱論死兄弟三人相隨入獄仰天歎曰吾等提兵百戰爲國家出死力卒勦倭不料今爲獄吏所困手足一舒械繫俱裂因痛飲自縊家人收其屍顏色如生大年大邦聞難感憤棄兵歸黃姚仍爲大戶然性強暴凌人卒鼓衆怨萬厯初應嘉備兵蘇松下車首詢嚴氏族強大聲勢如昔頗意其所爲不法而怨家復陳牒言事於是大年謫戍道死而大邦及兒子星斗二人俱坐斬臨刑星斗冤泣不已大邦厲聲叱曰監子何怯吾昔與若父戰寶山當四五萬賊不死今死于此命也且殺人多矣能無及乎乃慷慨就戮黃姚人立祠祀之凡出海求魚鹽祈禱無不應者

邱將軍亡其名羅店人生于正德初善矛有膽略身長可九尺且肥故里人稱曰將軍嘉靖間倭寇羅店刀光蔽野男女逃賊者號哭奔走邱大怒歸取所持矛倒拖之走至南塘高阜立謂逃賊者曰但速行我立此稍羈賊汝定得脫矣邱乃瞋目大喝賊稍却俄一賊舞長刀前砍邱退後作勢倏忽騰進刺之洞胸後一賊復至未數武已飛矛中之斷其喉賊乃結陣併力直前邱故所善同里馬千斤者亦力士也適遠來助大呼殺賊長矛所向殲斃甚多而邱力已倦見東向賊衆奄至乃太息謂馬曰若急走彼生兵大來非乃所能當也我體肥不能行行亦不免今日死此矣賊去若可來收我骨馬不

肯去邱曰走矣若陪我死何益馬乃哭而走賊圍邱三匝邱且殺且罵復刺殺一渠魁鎗忽折遂爲賊所殺既去馬來坎土埋之市壺漿澆其上慟哭而去邑人王道通作邱將軍傳

王街金山役卒義烏人也占吳淞所籍每戰先登手殺倭甚衆氣猛務進棄首級不取返論功御史幕下御史以街無首級叱街妄言街曰此易耳明日再戰殺劇倭凡六輩盡取其首以歸御史異焉補街百戶街然街以取首級故身中創數十處出幕而死道通亦作詩以哀之

錢世禎字士孫春沂之子善騎射技勇絕人中萬歷十

七年武進士選蘇州衛鎮撫練兵吳江遷浙江運總時
朝鮮被倭發兵東征經略宋應昌疏加世禎遊擊爲前
鋒世禎率輕騎倍道疾馳渡鴨綠江抵肅寧至平壤都
督李如松約先登者賞萬金耐世襲指揮世禎以七百
騎過箕子墓喜曰此地多草木敵不知設伏邀我無能
爲也次日薄城下與家丁數人躍而登遂克平壤逐北
過大同江斬倭驍將旣而如松沒其前後功踰年僅授
薊鎮叅將調金山常鎮天津以老歸著有射坪東征實
記

黃世能字濟夫任陝西平涼衛經歷時平涼府靈臺縣
賊聚衆殺傷官兵巡按董國光率大軍擊之世能從國

光以數百騎授之使覘賊世能曰偵賊不宜多人多人賊必以吾爲挑戰遇輒鬪鬪必死今吾以數人往賊不備乃可得其情國光歎曰經歷知兵吾不及也世能往盡得賊要領遂擊破之國光以爲才委署崇信又署安定革去浮費八百餘金世能雖身居微秩不畏上官平涼推官楊某欲坐一人重辟世能察其非率力爭之楊知不可奪卽縱遣而陰中世能以不謹巡撫顧其志怒目經歷廉直吏也乃爲酷吏所中耶併劾罷推官嘗于涇陽逆旅得遺金二百物色其主還之不告姓名而去孫淳耀見列傳

須之奇字君常之彥從弟居廣福以學生具勇略入試

武闡天啟二年武進士選興泉守備海盜鄭芝龍入寇
總兵及興泉道被圍之奇整兵出救斬不用命隊長以
狗奮戰大勝之奇性傲不善事上官與巡撫熊文燦推
官趙繼鼎有隙會隊長子以父死告竟按擅殺軍兵例
論斬閩紳士代訴不得白卒于獄

崇明縣

元

殷明宋承信郎兩淮制置司統制馬步軍副總管至元
三十年爲海漕建言開新道較他運獨便上以爲有功
授顯武將軍領海船萬戶佩三珠虎符爵汝南郡侯
楊世興字伯起至元十三年從征雲南州郡歷任至忠

顯校尉海道運糧千戶佩金符大德四年董餉詣京師
年四十有二謝病歸號歸來子築室于舊州東海雲鄉
優遊卒歲年八十而終子德澤德潤德澤忠翌校尉吳
淞嘉所副千戶其子脫歡仕承務郎臨江路同知新淦
州事德潤不仕其子文驥來安縣儒學教諭

趙必華字實夫好學問初從范平章東征日本有功授
昭信校尉常熟所千戶佩金符出入海道四十年累受
寵錫官至顯武將軍爵天水郡伯

徐興祖從征交趾有功授保義校尉海運副千戶襲父
貴武德將軍海道副萬戶佩金符五遷至昭勇大將軍
海漕都萬戶上輕車都尉爵東海郡侯卒諡宣惠祖文

明及父俱贈如其爵

朱門達字顯之初從王招討征交趾有功累官至承信校尉海運上千戶子文德承務郎太尉府長史士英將仕郎濟寧府同知文德子鈞歷官至承事郎州判官以祖蔭讓士英子銓襲溫台所千戶

國朝

施文字駿臣邑庠生工詩善畫偉軀幹倜儻有大志順治十年張名振逼崇明上平海策總督郎廷佐巡撫周國佐異之授贊畫劄佐理海上軍務時名振距平洋沙倚洪爲險文建議築壩填洪復築城外郭改鑿新濠十六年鄭成功復犯城率衆防禦題授守備世襲拖沙喇

哈番尋去職卜築虎溪之南號瑞霞道人以山水自娛
卒年七十有三子國治別有傳

陸黃黼鳳有志略順治十六年總兵梁化鳳敗鄭成功
于江寧旋師守禦黃黼之籌畫居多授守備不就

王鳳少有膽略勇敢過人布衣年三十聞福建耿精忠
未靖歎曰大丈夫許身爲國在此時也遂從征授把總
攻取大溪灘復仙霞關諸路皆冠軍稍遷福寧千總與
賊戰于泉漳破之復惠安縣又敗賊于郭塘寨及下坑
山授遊擊銜康熙二十一年秋官軍大進拔漸山東埭
先登攻萬人砦橫塘江凡破一十九寨殺賊四千餘人
詔授左都督世襲拖沙喇哈番歷任貴州大定總

兵署提督鳳爲裨將與士卒同甘苦及貴顯約束嚴明而撫循益至故閩南迄今有仁聞年七十三致仕卒贈榮祿大夫子光含以蔭入監生官至刑部員外郎孫銘官杭州衛守備

沈勝字源如幼習水爲本營舟師外委時有海盜徐小高等聚黨肆劫官兵莫制總兵穆廷拭懸賞召募勝作賈客裝入賊巢誘小高至崇明隨請廷拭貰高罪以高爲導獲巨魁十數人皆伏法盜患息勝以功授千總遷鹽城守備後以習水師調崇明右營修戰艦議設小哨有效遷掘港都司卒于官

黃進字陶巖少業儒卓犖有節概總兵陳倫炯見而偉

之命就戎行歷任至浙江瑞安副將進諳練韜略尤長于撫綏任劉河遊擊福建海盜乘風利常以對畧船數百連絡海口伺間竊發進率兵驅之設哨房內洋以寧陞王環叅將王環爲溫台門戶重島複嶼在環海中而兵勢單弱力請于總督復舊營添戰兵邊備益密浙省漁船舊以石子壓艙捕魚不獲利輒用擲劫行商以爲利器進稔知其弊及爲瑞安副將乃令以土易石違禁者懲令行而害遂息以年逾七十致仕弟八人皆名諸生垣進士別有傳子振蘇松中營遊擊

宋勝字鴻臺兄玉光字虹如工文章熟史事爲名諸生而勝幼入行伍驍勇絕倫其刀劍諸技尤臻神妙歷官

吳淞水師守備善撫士卒以誑誤去官邑諸生楊澧爲
作宋將軍歌紀之

生員

黃烈校
王淳

直隸太倉州志卷三十九

直隸太倉州志卷四十

人物

隱逸

太倉州

晉

瞿劭先生字鵲子廣川人流寓直塘隱居不仕卒葬東

陵武安寺重岡之原

案張采志引舊志云慶元志載直塘有廣安寺浚塘得古冢磚刻稱

瞿劭先生武安一作武邱廣安寺舊額也晉書瞿劭先生不知何許人太和末嘗居宣城郡界文眷山山有瞿劭因以名後竟卒山中據磚刻則晉書失實又相傳寺中別得古磚有長安二年瞿像寶塔寺或因認爲劭或後人慕先生襲其號者

宋

直隸太倉州志

卷四十 隱逸

胡嶧字仲連天性高遠與郡中方子通惟深林德祖處
爲友放散泉石間建炎登極特以年格授官得迪功郎
安遠尉曰老矣承朝廷恩意可爾終不仕所居五柳園
加植松竹用杜甫宅舍如荒村句名其堂曰如村老人
嶧旣隱君子言動有尺度循率古法爲時宗重紹興十
四年卒年七十九子百能自有傳

俞君登字泰卿福州長樂人蚤孤母黃氏親授書宋末
累微不起宋亡隱太倉自號知止翁延祐中卒門人謚
曰貞節先生子焯字元明登泰定四年進士仙居縣丞

元

瞿孝禎字逢節瞿劭先生後工詩得句輒撫琴自適出

崑陽徙團溪關樂隱園與會稽楊維禎野航姚文奐句
曲外史張雨崑山顧瑛輩游不及聲利

瞿信字實夫兄智字睿夫

一作慧夫

時稱二瞿先生智敦儒

術歷郡縣校官藩府辟不拜信好學矜行食必男女別
席衣冠非就寢不去兄卒撫其孤子女數輩常出遇張
志道老儒寒甚解所衣授之至正台州寇作負母避地
青龍江上築室曰間野御史李烈舉孝廉不應子度舉
茂才授池州學正亦不許應至洪武初度始仕陝西金
縣知縣

呂誠字敬夫淹通經史不攬世務所居園林嘗蓄一鶴
復致一鶴因築來鶴亭知縣屢以師聘不就

朱旭字子陽清子爲中顯校尉海道千戶不樂仕進退
居田園從士大夫游通經史工書兼好施予人咸德之
盧觀字彥達少有秀材深湛于學受業鄉先生湯彌昌
錢重鼎之門見道分明稱義勇時公卿多欲列薦觀力
辭家居教授終其身門人私謚曰夷孝先生子熙熊自
有傳

顧權字伯衡其先蘭溪人父達卿始居太倉權幼質過
人長工易爲文尙實言不事夸伐散意詩酒未嘗及仕
宦與人交有禮度卒年五十門人私謚曰夷靖先生知
州揭傒斯教授蔡基葬之馬鞍山北

(明)

盧充穎字次農父熙傳其家學制行尤篤以能書薦將
官之會世父熊死非罪卽抱骸骨歸葬高隱不仕子儒
自有傳

周賢字思齊永樂間詔修大典以善書法徵辭曰母老
不能行也終以隱居卒俊儀趙永言誌其墓謂有陶宏
景風時號惠齋先生

劉密字慎之少孤事母孝詩宗白居易清潤自然流出
肺腑沈周重之著有玉田集

周詩字以言皇甫冲謂其文超朗其人踈曠或聞其名
造之輒避去妙于方藥作內經解與虞山孫艾善卒葬
吾谷

王璣字璿伯性孝嘗刲肱已父疾崇禎十三年武進士
守備柘林歷任副將移駐劉陽城及大兵徇劉河璣
方巡徼猝遇戰衆寡不敵中數矢而仆有老卒負之免
時統帥竒其勇欲生致之執其父母爲招璣慟哭曰吾
不能不爲親屈也因降署之職不受布袍草履躬耕奉
親年四十三卒妻許氏見列女傳

王日新字鑑明爲諸生食餼教授弟子有程法時明季
亂日新絕意科舉肆力于天文地理之學星緯形勝瞭
如指掌甲申後韜晦迹躬耕于野吳偉業贈詩比之
伏勝桓榮年五十四卒子發祥自有傳

王儀字異人諸生好讀書植行廉梗家壁立自守泊如

當事者高其行或遺以金不顧居城南數椽不蔽風雨
詠詩自娛巡按御史祁彪佳旌其門曰安貧樂道甲申
後棄儒冠放跡頭陀自號樂道人

宋龍字子猶崇明人萬歷時諸生遭亂避地婁東與陸
世儀陳瑚盛敬郁江王育等十人爲友其學淹貫經史
而歸於踐履篤實嘗扁舟入富春山慟哭謝皋羽祠鼎
革後隱于醫僧服終其身子黃榮康熙十七年武舉

陸羲賓字鴻逸能詩遭明季亂與陳瑚避地薛村晚築
春星草堂于城西一時名人皆樂與之游羲賓長身鐵
面貌甚蒼古精奇壬有智畧陸世儀謂其有英雄之姿
惜不遇時也

袁臨字孝宜弟賁字幼白同爲諸生父嶽字五游明諸生暮年與子偕隱卒諡靖安先生臨賁皆恃才負氣不可一世時稱二袁張溥舉復社奔走名士所不能致者二袁而已甲申後臨耕海濱嘯傲終老所作詩悽惋哀颯讀者悲之賁薙髮入山稱爲龍蔭大師

王瀚字原達少補諸生有至性淡於嗜欲執父喪哀毀過禮甲申之變毀衣冠祝髮隱於浮屠卒徙居廬山改名戒顯字願雲又稱黃梅破額晦山樵者能詩文方以智撰藥地炮莊戒顯序之

郭士髦字斯士居劉陽堡州廩生甲申遘變思以身殉輒中夜披衣起欲自沉舍旁池水念其父老且病不能

引決然拊膺植髮蹈海沈湘之志無刻去懷所居毀於
兵徙茜涇終身遁跡罕入城市侍父疾七年孝謹如一
日年六十五卒弟澥字人一從士髦學後棄儒冠隱海
濱案纂洋志云太倉士尚氣節勝國鼎移遂荒高蹈者
不止此數人如張元治在川等俱以諸生放廢自行
其志其可畏諸百年人遠其他屏跡荒
江恐有并其姓氏失傳者良可慨矣

顧鉞字雅儔蘇州府庠生讀書有原委重名節素志高
尚不苟去就喪祭多用古禮幼喪父母與季弟鎬相倚
爲家凡門戶事鉞任之家庭事鎬任之人稱孝友著勸
戒錄

毛雲漢字子五州庠生究心三禮著有禮記叅註約言
行世鼎革時與弟子九避兵瑣溪備嘗苦楚亂定還城

杜門不出教授生徒王吉武其門下也晚歲精禪學曾手書華嚴經藏於法輪寺子九名霄漢州庠生性廉靜不入城市以詩文自娛著有芥舟集

王挺字周臣時敏長子明季州庠生與陸世儀陳瑚諸人相師友以門廩補中書科舍人在官七月上疏請破格用人奉使兩浙却饋遺不宿官舍不赴公宴復命卽請歸養入國朝閉門却軌專事著述順治十一年

詔舉賢才辭不就晚年廢日日使家童誦書以聽爲文口占使書之名其稿爲不盲集卒年五十九祀鄉賢祠陸世榆字襄虞少爲諸生攻苦力學鼎革後委棄舉業每除夕必陳酒脯於堂祭而哭之不知其爲誰也當事

聞其賢往物色之以卧疾辭年六十餘卒

陸發字渚初諸生有文行鼎革時年未壯杜門高尚水亭竹園嘯咏其間嘗于危難中扶植孤寡士林多之

周西臣字倣文性孤峭少習制舉業幽微峭厲亦能詩鼎革後執耒躬耕倘佯自得

素金鴻縣志失載其名今從採訪得之

劉倣字以勉能文而不與試耽詩酒父欲爲入貲堅辭晚營別園疊山引泉蒔花植竹蕭然物外著有友荆集劉瓌字宗實家穿山嘗芒鞋竹杖放歌行吟足不入城市藏書充棟讀之期于自得不欲形諸言也

王日昱居多古木有枯樹王家之稱閉門不出以道德自持人稱隱君子

陳于湖字青來性高介落落入世善鑑古器物書法蒼勁工詩著狎鷗草

陶鴻祚字喬昌居直塘里鴻祚少讀書不屑科舉業居家遵先儒斥二氏自以生不遇時嘗痛哭于荒江蕭寺間著英雄淚二十卷重編元通鑑綱目若干卷所與交者學正文祖堯及州人王育盛敬華乾龍袁賁陳瑚及其甥顧鉞數人卒抱憂憤以終

國朝

張曾愈字濟臣州廩生幼從父震亨自崑山徙太倉性謹愿好讀書與一時名雋結玉峯十五子社徐乾學時未第尤爲莫逆乾學貴顯招之勿往隱居劉河不飾名

不競利澆花種秫怡然忘老以子貴封奉直大夫兩舉鄉飲大賓里人推長者年八十四卒子介眉由學博仕至工部郎中歷官四十年家貧甚於未仕時

吳周貞州庠生自幼繙閱家譜見舉進士孝廉者不甚羨獨至其曾祖昆弟以才略氣節樹聲邊疆洎族兄繼善捐軀殉國輒爲色動青衫一領非其意也初有負郭田三頃二子壯有室分授之餘十一以自給卒年八十有八

李誠字徵久好學耽詩居窮巷苦吟不輟古貌古心不與人合許廷鑠賞其詩每相過必竟夕談稱莫逆焉

趙震字鴻儀少讀書能書畫不事舉子業亦弗娶也年

六十貌癯神清入其室蕭然四壁畫則赴館爲童子師
夜歸自炊爨率以爲常積所得修脯葬父母暨弟人咸
稱爲畸士

嘉定縣

元

嚴恭字景安父淑仕爲通山縣尹恭才藻斐然恬淡不
樂仕進嘗築室海上號惜寸陰齋以琴書自適後避亂
居於青龍鎮之章堰

明

王翹字叔楚一字時羽蘇州府諸生旋謝去嘉靖間倭
亂常居軍府贊畫詩宗孟郊畫工風竹草蟲亦時仿米

家山水酒酣濡筆求者無不滿意去豪貴強之卽不可得嘗冬月詣故人金兆登宿兆登伺其寢潛以新衣易之質明仍索鶉衣服之而去

朱纓字清父其父鶴號松鄰高潔博雅工摹印以意刻竹樹爲玩纓益盡其巧性嗜酒故獨酒家能數得之他求者弗卽應也尤不屑與富貴交知縣嘗召之不往知縣急之曰我能破家纓笑曰我乃無家可破徽王以幣召纓謝曰鋤草衡門則有餘曳裾王門則不足未幾王坐法廢人服其先見書工小篆及行草畫尤長于氣韻不多爲詩間一書其中所欲言有悠然之味知縣朱廷益表其廬曰練水逸民子稚美稚征稚美字伯魯少有

文名殷都贈詩云而翁自是九臯鶴之子真成千里駒
性恬退與徐允祿張表劉維藩稱練川四隱以諸生老
稚征字三松祖父兄弟三世並高尚征尤工雕鏤歷歲
月始成一器喜飲酒作畫亦有逸致

張名由字公路博涉經史喜談兵萬歷年間北歷齊魏
燕趙之郊每遇古人營陣戰壘輒指陳其勝敗是時天
下尚太平莫不迂之所居安亭有田數頃僮僕數十盡
棄去爲貧人自後徭役繁重有田者逃死名由獨晏然
環堵中讀書談道年七十九而歿

沈宏正字公路邑諸生居母喪三年不御酒肉性情恬
淡絕意仕進天啟初詔求巖穴之材大臣疏薦弗應爲

園十畝有水石竹林之勝詞客酒人常滿座喜聚書所
藏多善本

李更字剩齋性不羈髮未燥卽爲歌詩陳繼儒見而驚
異受學于程嘉穰唐叔達與邑詩人酣游于酒壇花肆
間嘯咏自得

閔裴字裴村家世力田初學制舉業尋棄之學詩所居
老屋數椽竹厨土銚饘粥不給日仰屋苦吟有憐其貧
賑之者峻拒弗受其人怒推裴墮溝中因跛一足生平
事母孝撫二弟有恩侯峒曾題其廬曰孝恭黃淳耀哀
刻其詩序以傳之

陸坦字履常父嘉穎字子垂工詩坦由府學生舉崇禎

三年鄉試與同年楊廷樞以名教自任十四十五兩年
奇荒繼以兵燹著鄉兵議條畫甚悉後隨父傲居吳門
隱于賣卜

李允新字元映監生工文章薦中書會 鼎革不就子
符韜字明揚從子際鼎際臨並有聲藝苑

王景曦原名樹德字子萬崇禎時以錦衣衛武舉授千
戶曾上官疏請開懇瞿山以景曦爲屯田都司便宜行
事功將就丁外艱遭 鼎革家居杜門力田奉母以終
張雲章爲墓誌弟樹勲字子貞隱于醫卜嘗還人遺金
王泰際字內三祖汴字震峯好善樂施建石梁自東關
至六都相接歲饑賑粟爲一邑倡泰際登明崇禎十六

年進士嘗遺書同年黃淳耀作偕隱計淳耀答書謂去
城而鄉雖埋名不能而潛身可得泰際從之奉母居家
冠婚喪祭以深衣幅巾行禮終身稱前進士一事不與
州縣相關絕跡忍餓築室三楹顏之曰壽硯因自號曰
硯存老人巡撫巡按相繼勸駕皆辭弗應隱居逾三十
年而歿知縣陸隴其爲文祭之比之龐德公陶靖節其
友陸元輔張雲章等私謚貞憲子霖汝字公對崇禎十
二年舉人楫汝字翰臣後改名翊順治八年舉人梓字
畱林監生咸有文名以行誼稱於鄉楫汝子晦晦子敬
銘梓子恪皆別有傳

申艇字虛舟三歲而孤母楊氏撫之成立讀書砥行中

崇禎十三年副榜貢生後隱居奉母授經以老著有見聞隨筆皆勝國三百年中軼事有關風教者

金汝鉉字公調施鳳鳴字仲臯皆諸生入國朝皆當貢不就汝鉉隱於醫足不出戶就診者常接踵鳳鳴安貧以歿齒

盛萬紀字無紀諸生聞闖賊陷京城痛哭累日卽棄儒冠隱東郊所居屋三楹不蔽風雨前植梅數十株日吟嘯其下

沈卜琦本姓卜字一韓少從孫元化遊具經濟實學元化治兵邊關卜琦常在軍幕已而歸里補諸生後屏居村塾口不談時事及歿崑山諸士儼私諡之曰景白

朱湘字子旭少受學于黃淳耀及淳耀殉節棄諸生授徒餬口性嗜書至老彌篤年八十有九

汪彥隨字子肩明際子中崇禎六年副榜貢生明際以庭杖斃彥隨匍匐數千里扶櫬歸里棄其所居營葬于北門外終身廬墓焉 鼎革後足不入城市衣冠不爲時制武林嚴某其父行也嘗相存問及某之子沆貴爲副都御史同至嘉定彥隨辭以疾卒不見族兄舉人溥亦高隱雅與相善溥姪某爲蘇州府同知按部至邑彥隨望見輿蓋走匿不出其志行如此工畫理入米顛倪迂之室年七十餘卒子來許孫嘉禾皆有文名

華乾龍字天御崇禎十二年舉鄉試禮闈歸父方屬纊

居喪不入內絕葷酒三年母喪亦如之事其兄老益恭
時稱爲真孝廉甲申後遜居荒野謝絕人事睢州湯斌
來撫吳延主講席以疾辭乾龍于學無不闕而未嘗以
文章名生平主洛閩之學言動必以禮而未嘗聚徒講
學招引聲氣窮居隱約短褐不完脫粟不飽年垂八十
教授自給怡然安之曰吾道然也同年生毛天麒王揆
每晏集馳使招之乾龍終不赴二人常嘆曰華先生非
獨有司不能招卽吾輩亦不可得致也與吳門孝廉徐
枋時稱兩隱君子卒門人私謚安止先生所著載藝文
類

黃望字雲沼淳耀子四歲而孤及長絕意應舉隱居授

徒以老爲人介持有守不苟取予工書法亦能詩

趙克聲字芳尹性孝友好讀書日偕侯峒曾黃淳耀講
藝長子允淑能讀父書早夭遂棄舉子業惟與許自俊
輩酬唱爲樂三舉鄉飲固辭

龔元侃字得和諸生以父用圓伯父用廣死難與兄元
昉隱居不出博通載籍從遊者甚衆臨終戒其羣從及
諸子曰吾家詩書清白四百餘年雖貧毋改操也門人
謚曰孝節先生

朱樵字蕪久隱居外岡與太倉陳瑚崑山諸士儼輩皆
挫廉逃名行文有根据明大禮私議廣歐陽公濮園議
爲通人所稱

馬舒字應之少承家學爲復社眉目鼎革後絕意進取屏居荒村資教授以餬口工于古文辭康熙十二年聘脩邑志及二十年復請修補以牾疾作而歿

孫和斗字九野元化仲子篤於孝友順治二年嘉定城陷弟諸生和京夫婦死難和斗與兄和鼎謝去諸生不關世務元化部將皆顯貴延致之或諷以仕輒不應辭歸食貧偕隱泊如也至經理侯峒曾之家事脫陳子龍之遺孤尤當于古人中求之子致彌自有傳

殷開之字長文邑諸生都長子閉戶讀書有志節雷思霈爲都門人招之不往贈以金亦辭之著有德徵錄子登順治二年死於亂兵

沈宏祖字彥深高才博學邑有大事有司咸往問之崇
禎十五年侯汧等以漕米永折事叩閣稿出其手得
俞允遇歲荒糶給官米有司皆令主之民得實惠有司
舉薦謝之高隱以沒子承祐康熙三十八年武舉人
侯汧字記原岐曾之子崇禎十五年順天副榜貢生少
好學博極羣書究心經術邑有復漕之事汧同張鴻磐
伏闕上書得仍承折甲申後屏迹園居學道張能鱗以
高士旌其廬通政故第被里猾佔作神廟汧力復爲上
谷宗祠康熙十三年同修邑誌以水利與折漕相表裏
遂獨任焉繪圖著說瞭若指掌平生孤行一意不求諧
俗卒後友人宋實穎繆彤等私諡曰潛確

蘇震字長侯黃淳耀弟子甚爲稱許父母有疾衣不解帶至爲嘗糞事其兄嫂如事父母甲申以後隱居不出與陳瑚諸士儼陸元輔輩結東泉社

談允厚字厚君童子時爲知縣陳一元識拔性高潔不輕進謁每有贈遺皆却不受嚴衍字之以妹後棄諸生與衍同補資治通鑑五百卷又著通鑑胡注補若干卷子澣縣學生孫羽豐廩生皆善屬文

國朝

嚴鉉字式如居南城落拓不羈工書法詩文清疎間放間作山水亦有淡遠之致晚年隱跡吳門與林雲鳳陸坦等共結方外社

李春暉字二華孝友肫篤有古人風隱於新涇里教授生徒歿後門人謚曰貞介先生

顧予謙字仙隱家白鶴村聰敏能文爲邑學生順治二年謝去舉業遠於榮勢同祖兄弟有貴顯者卽以酒食相呼亦弗應也晚於書法尤精卒年八十有一

沈晉公字二裴篤于孝行善詩文尤長樂府爲陸隴其所器重隴其致仕歸邑人侯榮往候之問及二裴榮愕然不知隴其曰如此高士子未識乎榮歸卽與締交一時名士爭往候之然終杜門不出趙俞爲立傳

金肇泰字來瞻爲諸生食餼需次當貢讓之老友次年卽以逋案累誤終身無怨言

唐亮工字惟時邑諸生家世習賈亮工獨奮志讀書刻苦勵行尤潛心易學鼎革後絕意進取教授生徒藉館穀以孝養

張應選字伯英諸生矢志潛修教授六十餘年生徒數百年九十餘猶能飲酒一石不醉人稱爲嚆水地仙

錢民字子辰年十三而孤家貧廢書學賈久之乃嘆曰世多妄人求其不妄者聖賢而已初名樞嘗夢人教以民名覺而思曰聖人與民亦類也遂易今名慨然有學聖之志聞青浦有孔子衣冠墓擇日齋戒往謁是夜夢有來告者曰謝絕漢以來諸儒論說乃可爲學自是始讀四書正文題所居之室曰存養廬日靜坐其中所學

日進陸隴其知嘉定縣與民論學多不合怪而詢之則
曰公從文公入某從孔子入耳嘗與友人書謂先聖之
學貴乎本末兼盡始終有序大學所謂知本者知所作
聖之基也誠正者爲其作聖之功也中庸所謂尊德性
先也本也道問學後也末也卽物窮理其誤在於無本
六經爲我註脚其誤在於無末論語曰君子務本本立
而道生文公以爲學者不可厭末求本教人但學其末
是所謂其本亂矣本亂而求末之治豈可得乎此未合
于大學也孟子曰堯舜之知不徧物中庸曰雖聖人亦
有所不知焉文公教初學者卽責以知旣盡而後意可
誠語類又云格物者窮事事物物之理致知者知事事

物物之理如此則意之惑亂殊甚又何可誠且使堯舜復生亦恐知不徧物况初學乎此未合于孟子也程子曰不必盡格天下之物又云存心一草木器用之間如此而望有得如炊沙而欲其成飯也文公則曰上而無極下而一草一木一昆蟲之微亦各有理一書未讀卽闕了一書道理一事不窮卽闕了一事道理一物不格卽闕了一物道理須著逐件與他理會過愚意無極太極是天人合一之學學至有成亦可自得初學者學之雖非先務無傷也草木昆虫事物之衆人無百歲壽算何能一一盡之孟子以爲治天下不可耕且爲文公亦以爲大臣不當親細務奈何志在學聖而反務盡一草

一木一昆蟲之微哉此未合于程子也又言今之學者不知追求孔孟之實而只辨朱陸之所以異非聖學本務去道甚遠所以近世學文公者止得念庵之學而已矣學象山者只得陽明之學而已矣在朱陸當日雖有不同亦不至相關如明儒之甚也學聖而相關是務故聖學日亡也其議論如此民又以意更定四書次序不

免果于自信矣

按陸隴其錢子辰字說錢子子辰初名

夫向者之不聞道也因其名曰民而請字於予且問學焉予告之曰子何以改名爲哉自古聖賢豈皆生而聞道者耶蓋亦有始爲庸人一旦發憤而力學者矣方其未學人聞其名而忽之賤之及其既學則人聞其名而重之敬之名不變而聞其名者變矣何以改爲哉然吾聞之新沐者必彈冠新浴者必振衣惟恐其舊染之汚也子辰志於學而改其名是亦彈冠振衣之意也且業已改之矣然則請改其名而仍其字可乎子辰曰吾初

之名樞而字子長也蓋取北辰天樞之義今改其名而
仍其字母乃名與字不協乎余曰何爲其不協哉夫聖
人之道始乎卑極乎高始乎過極乎遠其爲道不過君
臣父子長幼夫婦朋友其教人用力之方不過學問思
辨篤行其修于身也不過忠信篤敬懲忿窒慾遷善改
過其處事而接物也不過曰正其誼不謀其利明其道
不計其功已所不欲勿施於人行有不得反求諸己初
無高遠難行之事杳冥昏默不可知之理而造其極則
至于位天地育萬物是故卑者高之基也邇者遠之則
也今天下之卑且邇者莫如民而高且遠者莫如長
子長誠審乎民之義則守其庸言庸行循循乎矩矱之
中而勿躐等以進誠審乎長之義則以聖神爲必可學
以參贊爲不足異而勿半途而廢始乎民終乎長聖學
備矣中庸曰夫婦之愚可以與知民之謂也及其至也
察乎天地長之謂也論語曰下學而上達下學
者民之謂也上達者辰之謂也子辰勉之哉

戴范雲字機又布衣性嗜書先賢著述累抄成帙一時
名士如張雲章張鵬翀皆樂與之遊

周人玉字首生喜讀書開一圃曰小山林日坐品菊軒

覓句亭偕二三知己賦詩見志兼工隸篆顏其門曰藿園有藿園集

劉允亮字繼明幼孤克自樹立博涉羣書晚年益工吟咏性峭直面折不少貸樂善好施豁如也自號瓢隱詩人

沈文璋字華璧好爲詩與同里李吟禪關中秦際雲輩唱和嘗放浪于京口淮揚間歌館旗亭輒形歌詠顧思字心田砥行積學不屑爲舉子業隱居授徒入白沙社專事吟咏以終其身

原明縣

元

楊德潤字恕齋隱居不仕閉戶讀書時人呼爲楊隱者
施善字林塘隱居教授工詞翰嘗從趙孟頫游甚器重
之

明

劉顯字昂夫洪武初以賢良方正薦尋乞歸隱居村墅
構一小樓棲息其上未嘗窺城市教導後學不事浮飾
鄉里化之

季崇直亡其字永樂間人立行端恪閉戶寡交鄉人以
爲式宣德初舉學行科辭不赴子宗林克世其家
倪允中字道傳屏跡邱園不屑酬應以琴書自樂陶陶
如也人對之如坐春風

黃應箴字用和性沉靜讀書課子杜門不出鄰里罕識其面

黃繼字彥承隱居投徒不習舉子業嘗謂人一有干進心便與聖賢道理如隔膜聞者服其高識

施文禮字克賓淡于勢利自署書室曰濠州仙隱日吟咏其中

高允升字升之性高潔工書尤長于隸草不輕與人人益寶貴之中年棄家老于淨菴

顧其康字錫之世爵崇明千戶高祖廷用贅于崑山因家焉其康邑諸生藉修脯以供甘旨人稱其孝值明季不應試時學道朱某以賢良薦授浙江松陽教官亦不

就善奕喜飲讀書老而彌篤戒其子瀛秀曰我一生不求人知不因人熱又曰不愧屋漏勉焉而未逮也汝曹志之瀛秀字玉書以崑籍登順治十八年進士

黃二麻自晦其名銘丹弟寒暑皆露頂敝衣不濯出必以扇自障或問之泣而不答有田五百畝爲人所據二麻惡見吏弗與爭退耕白茆後不知所終

紺雪老人明末遺民不詳姓氏有竹題集一卷多弔甲申殉難諸賢之作其集題句云靜室焚香穿膝坐長廊看畫散衣行可以想其風槩

國朝

張王政字德爲少讀書能文章稍長多病不娶朝夕以

琴自遣究心易理著易辨四卷竹籬茅舍環堵蕭然過者時聞琴音書聲而已康熙四十七年卒年六十餘葬于仙景沙

胡善述字懋旃家貧不事生產工書畫通醫術尤耽吟咏與金城相唱和性高尚知縣解銘亟餽粟肉不受顏其廬曰瀛海武城

袁萬琛字憲銘邑諸生好讀書不入城市舉鄉飲介賓年八十二子璜緒以歲貢生任通州訓導年已六十爲親稱觴時人謂之班衣樂云

沈寓字右以布衣能詩古文獨不屑治舉子業少時彈琴于蘇州之小雲巖時有洛中王子方者見而異之曰

爾相三負無其時負天地空所生負父母無人世緣負
已且爲筮之得節之坎寓曰吾知之矣初名已任由是
更今名別號寄廬亦曰煙波客放浪山水間行踪無定
登嵩山踰雁宕西入巫峽獨不至京師曰此熱場也慕
汪琬名通以書札琬亦雅重其文招之不可倦遊歸自
顏其居曰白華莊卒年七十有九著煙波筆嘯六十卷
曾孫奕蘇梓以行世族姪湎爲之傳